

## **UCAPAN ALUAN**

**Y.BHG. PROF. DR. ZULKIFILIE BIN INBRAHIM  
MENJALANKAN FUNGSI NAIB CANSELOR UTeM**

---

## **PERASMIAN PENUTUP**

**MICROSOFT PROFESSIONAL PROGRAM DATA SCIENCE**

15 Januari 2019 (Selasa), 2.30 petang,

Audi Canselori

Terima Kasih Saudara/i Pengacara Majlis

## **A) SALUTASI**

**YBhg. Prof. Dr. Arham bin Abdullah**

Pengarah Bahagian Hubungan Industri, mewakili Ketua Pengarah Pendidikan Tinggi, Jabatan Pendidikan Tinggi

**YBrs. En. Mohd Isa bin Mohd Dom**

Ketua Pegawai Maklumat UTeM

**YBrs. Prof Madya Dr. Mohd Rizal bin Saleh**

Penyelaras Program Profesional Data Sains Microsoft

**Pegawai-Pegawai UTeM, para peserta, hadirin dan hadirat yang dihormati sekalian.**

*Assalamualaikum* warahmatullahi wabarokatuh dan Salam Sejahtera

## **PENDAHULUAN**

1. Alhamdulillah, setinggi-tinggi syukur kehadiran Allah SWT yang telah mengizinkan kita untuk berkumpul pada petang ini sempena majlis perasmian penutup **Program Persijilan Profesional Data Sains Microsoft.**
2. Pertama sekali, saya bagi pihak Universiti Teknikal Malaysia Melaka amat mengalu-alukan kehadiran YBhg. Prof. Dr. Arham bin Abdullah, Pengarah Bahagian Hubungan Industri, yang mewakili Ketua Pengarah Pendidikan Tinggi, Jabatan Pendidikan Tinggi kerana sudi

meluangkan masa dan hadir bersama-sama kita pada petang ini. Sokongan berterusan dan kepercayaan penuh yang diberikan oleh Jabatan Pendidikan Tinggi terhadap UTeM dalam menjayakan program ini amatlah kami hargai.

3. Dikesempatan ini, saya ingin mengucapkan syabas dan tahniah kepada 80 orang peserta dari pelbagai Universiti Awam yang mengambil bahagian seperti UTeM, USIM, Unisza, Unimap, UMP dan UMS, kerana telah berjaya mengharungi program ini selama enam (6) bulan, yang bermula sejak Julai tahun lalu. Alhamdulillah, daripada jumlah ini seramai 69 orang peserta telah berjaya dianugerahkan dengan Sijil Profesional Data Sains Microsoft. Tahniah diucapkan!

4. Sebagai makluman semua, pada masa ini, Malaysia merupakan satu-satunya Negara di rantau ini yang telah melaksanakan program persijilan ini sehingga ke tahap projek Capstone dengan jayanya. Diharapkan program bermanfaat seumpama ini dapat dilaksanakan secara berterusan bagi memenuhi keperluan mendesak bidang sains data yang amat diperlukan oleh Negara ini.

**Hadirin dan Hadirat sekalian,**

5. Sains Data merupakan bidang baru yang mempunyai kepentingan dan keperluan yang amat kritikal kepada Negara kita khususnya dalam usaha kita mencapai status negara maju terutamanya dalam bidang sains dan teknologi. Berdasarkan perangkaan seramai 10,000

orang saintis data profesional diperlukan oleh Negara ini menjelang tahun 2020.

6. Menyedari senario ini, UTeM sebagai pusat perkembangan ilmu senantiasa menyambut baik usaha-usaha murni menerusi penganjuran program seperti ini. Kami percaya pengisian program yang telah dirangka dengan sebaiknya dapat memberi nilai tambah di samping dapat meningkatkan lagi tahap kompetensi para pelajar terutamanya dalam mempersiapkan dan melengkapkan diri bagi menghadapi cabaran alam pekerjaan yang semakin kompleks pada masa mendatang.

7. Selain daripada itu, sebagai makluman bersama, UTeM senantiasa memastikan program-program akademik yang ditawarkan khususnya dalam bidang ICT kekal relevan dan memenuhi kehendak revolusi industri 4.0, menerusi semakan silibus program-program ini secara berkala dengan penglibatan dari pelbagai pihak yang berkepentingan. Ini bagi memastinya kandungan pembelajarannya adalah yang terkini dan terkehadapan menepati kehendak pasaran kerja semasa dan pada masa hadapan.

## **Hadirin dan Hadirat sekalian,**

8. Saya percaya sepanjang program ini berjalan, para peserta telah memperoleh pelbagai ilmu baharu dan pendedahan yang merangkumi aspek pembelajaran di dalam kelas dan secara atas talian, pendekatan menerusi latihan amali atau *hands-on*, sesi perkongsian dari wakil industri, penyediaan projek akhir, dan lain-ain lagi.
  
9. Apa yang diharapkan, agar para peserta dapat mengaplikasikan segala ilmu yang diperolehi dengan sebaik-baiknya dalam mempertingkatkan kualiti diri seterusnya menyumbang terhadap pembangunan Negara kita yang tercinta ini.



10. Sebelum mengakhiri ucapan, sekali lagi saya mengucapkan setinggi-tinggi tahniah kepada Pusat Perkhidmatan Pengetahuan dan Komunikasi dan Fakulti Kejuruteraan Pembuatan UTeM atas kejayaan merealisasikan program ini. Insya Allah, atas permintaan yang semakin meningkat, program ini akan diteruskan bagi Kumpulan Kedua seramai 80 orang peserta, yang bermula pada hujung Januari ini nanti.
  
11. Akhir kata, saya ingin mengucapkan setinggi-tinggi penghargaan dan terima kasih kepada Jabatan Pendidikan Tinggi, Microsoft Malaysia dan Iverson di atas inisiatif dan sokongan berterusan sehingga Program Persijilan Profesional Data Sains Microsoft dapat dilaksanakan dengan jayanya.

12. Sekian sahaja ucapan saya. Terima kasih